

# 陋室銘

劉禹錫

山不在高，有仙則名；

水不在深，有龍則靈；

斯是陋室，惟吾德馨。

苔痕上階綠，草色入簾青。

談笑有鴻儒，往來無白丁。

可以調素琴，閱金經。

無絲竹之亂耳，無案牘之勞形。

南陽諸葛廬，西蜀子雲亭。

孔子云：「何陋之有？」

# 飲酒(其五)

結廬在人境

而無車馬喧

問君何能爾

心遠地自偏

採菊東籬下

悠然見南山

山氣日夕佳

飛鳥相與還(旋)

此中有真意

欲辯已忘言

陶淵明